

Ilinniagaqartut nunatsinneersut Danmarkimi najugaqartut nunatsinni Folketingimut qinigassanngortittunik qinersisinnaanerat aqutissiuunniarlugu Folketingimut qinersinermut inatsisaasup allanngortinnissaa pillugu saaffiginninnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inuit Ataqtigiit Inatsisartuni gruppianni ilaasortat)

Siullermeerneqarnera

Akissuteqaat

(Naalakkersuisut Siulittaasuat)

Aallarniutigalugu aalajangiiffigisassatut siunnersuummut Naalakkersuisut qujaniarput. Soorlu siunnersuuteqartup oqaatigigaa ilinniagaqartut nunatsinneersut Danmarkimi najugaqartut folketingimut qinersisoqartillugu Danmarkimi qinigassanngortitunik qinersisinnaapput, qinigassanngortittunilli nunatsinneersunik qinersisinnaanatik. Siunnersuuteqartoq taamaattumik isumaqarpoq, ilinniagaqartut nunatsinneersut Danmarkimi najugaqartut nunatsinni Folketingimut qinigassanngortittunik aqutissiuunniarlugu Naalakkersuisut Naalagaaffeqtigiiffiup iluani oqartussanut saaffiginninnissaat pissusissamisortoq.

Naalakkersuisut siunnersuuteqartoq isumaqatigaat, kissaatigaluguli inuit allat ilinniagaqartutulli Kalaallit Nunaata avataaniikkallartariaqartunut nunatsinni folketingimut qinigassanngortittunik aamma qinersisinnaasariaqartut. Inatsisartunut kiisalu kommunalbestyrelsimut, nunaqarfinni aqutsisunut ilagiillu sinniisaannut qinersinerni killissalersuinerit assinganik inuit kikkulluunniit Kalaallit Nunaata avataaniikkallartut, nuunnginnerminni sivikinnerpaamik ukiut marluk Kalaallit Nunaanni inuit allattorsimaffianni nalunaarsorsimasut, Kalaallit Nunaanni aalajangersimasumik najugaqarsimanissamik piunasaqaat eqqaassanngikkaanni qinersisinnaanngorlugit killissalersuisoqarsinnaaalluarpoq.

Inuit tulliuuttuni taaneqartut tamatuma kingornatigut folketingimut qinigassanngortittunik nunatsinneersunik qinersisinnaasariaqartut:

- 1) Inuit ilinniagaqarnissaaq siunertaralugu Kalaallit Nunaata avataani najugaqartut.
- 2) Inuit peqqissutsikkut peqquteqartumik Kalaallit Nunaata avataani najugaqartut.
- 3) Inuit Kalaallit Nunaanni qinigaallutik folketingimut ilaasortaasut sulinerminnut atatillugu Danmarkimi najugaqartut.
- 4) Inuit Namminersorlutik Oqartussat sinniisaattut nunani allani najugaqartut.
- 5) Inuit Kalaallit Nunaata avataanniittut inunnullu 1-imiit 4-t taaneqartunut sanilliullugit taamatut Kalaallit Nunaannut attuumassuteqarluartutut isigineqarsinnaasut.
- 6) Inuit aallannginnermi inunnik 1-5-imi taaneqartunik katissimasut katissimasunulluunniit sanillersuunneqarsinnaasumik inooqateqartut.

Naggataatigut erseqqissarneqassaaq aqqissuussineq siunnersuutigineqartoq inuit pineqartut

25-09-2015

UKA 2015/39

namminneq qinersinnaasariaqaraluaat.

Naalakkersuisut taamatut itisiliillutik siunnersuut akuerineqassasoq inassutigaat.